

## Reglur Hafnarfjarðarbæjar við útgáfu starfsleyfa til dagforeldra

Starfsemi dagforeldra er háð leyfisveitingu bæjaryfirvalda í samræmi við reglugerð nr. 907/2005. Ef um er að ræða daggæslu með sex börn eða fleiri þarf til viðbótar starfsleyfi heilbrigðisnefndar sveitarfélagsins í samræmi við reglugerð um hollustuhætti nr. 941/2002.

Hafnarfjarðarbær ber ábyrgð á velferð barna í sveitarfélaginu og skal sjá til þess að aðbúnaði barna sé ekki áfátt, sbr. 1. mgr. 30. gr. laga um félagsþjónustu sveitarfélaga nr. 40/1991.

1. Fræðsluráð, fyrir hönd bæjarins gefur út bráðarbirgðaleyfi til eins árs að uppfylltum öllum skilyrðum sem kveður á um í reglugerð nr. 907/2005. Eftir það er starfsleyfi veitt til allt að fjögurra ára í senn.

Verðandi dagforeldrar þurfa að sækja um starfsleyfi á þar til gerðu eyðublaði og skal fylgja því eftirtalin gögn:

- a. *Persónuskilríki* sem staðfestir að umsækjandi sé eldri en 20 ára. Ef umsækjandi er orðinn 65 ára er honum veitt starfsleyfi til eins árs í senn.
  - b. *Starfsréttindanámskeið*. Undanþága frá því skilyrði er ef umsækjandi hefur menntun á sviði uppeldismála sem fræðsluráð metur fullnægjandi.
  - c. *Læknisvottorð* sem staðfestir að ekki hafi fundist merki um sjúkdóm, þar með talin áfengis- og fíkniefnavandamál eða annað sem hindrað geti að umsækjandi geti tekið að sér daggæslu barna. Einnig skal koma fram að aðrir heimilismenn hafi verið skoðaðir og ekkert athugasvert fundist við heilsufar þeirra sem hindri samvistir við börn.
  - d. *Umsögn síðasta vinnuveitanda* eða umsögn tveggja ábyrga aðila ef atvinnurekanda er ekki til að dreifa. Umsögnin skal bera með sér að umsækjandi teljist hæfur til að taka að sér barn í daggæslu.
  - e. *Sakavottorð* sem staðfestir að umsækjandi og aðrir heimilismenn yfir 18 ára hafi ekki hlotið refsidóm fyrir brot gegn ákvæðum XXII. kafla eða XXIII. kafla almennra hegningarlaga nr. 19/1940.
  - f. *Húsakynni* undir starfsemina skal uppfylla ákvæði reglugerðar um hollustuhætti nr. 941/2002 og skal það staðfest af fulltrúa sveitarfélagsins. Sé um að ræða daggæslu með sex börn eða fleiri þarf að liggja fyrir starfsleyfi heilbrigðisnefndar sveitarfélags í samræmi við reglugerð um hollustuhætti nr. 941/2002.
  - g. *Staðfesting eldvarnareftirlits* um að brunavarnir á heimili umsækjanda uppfylli byggingareglugerð nr. 112/2012.
  - h. *Lóð, leiktæki og leikföng* skulu uppfylla ákvæði reglugerðar um hollustuhætti nr. 941/2002, reglugerðar um öryggi leikvallatækja og leiksvæða og eftirlit með þeim nr. 942/2002 og reglugerðar um öryggi leikfanga og hættulegar eftirlíkingar nr. 408/1994, eftir því sem við á. Útivistarsvæði barnanna skal vera afgirt.
  - i. *Slysatrygging* skal dagforeldri kaupa vegna barnanna innan mánaðar frá því leyfi var veitt og framvísa staðfestingu þar að lútandi til daggæslufulltrúa.
2. Við endurnýjun starfsleyfa þarf að sækja um á sérstöku eyðublaði. Umsækjandi skal ávallt skila inn gildu starfsréttindaskírteini, læknisvottorði fyrir hann og aðra heimilismenn, sakavottorði fyrir hann

og aðra heimilismenn eldri en 18 ára, gildu vottorði um námskeið í slysavörnum barna og brunavörnum og öryggi barna.

3. Dagforeldrar sem óska eftir því að flytja starfsemi sína til Hafnarfjarðar frá öðru sveitarfélagi og hafa í gildi öll tilskilin leyfi frá viðkomandi sveitarfélagi geta sótt um leyfi til fjögurra ára fyrir allt að fimm börn að uppfylltum eftirfarandi skilyrðum:
  - a. Umsækjandi hefur gilt starfsleyfi og unnið sem dagforeldri í a.m.k. fimm ár (reynslutímabil fyrsta árið og hafa unnið heilt fjögurra ára starfsleyfistímabil).
  - b. Hefur ekki fengið áminningu í starfi.
  - c. Skilar inn vottorði / meðmælum frá því sveitarfélagi þar sem starfsemi fór fram.
  - d. Skila inn öllum þeim gögnum sem óskað er eftir þegar dagforeldri hefur störf hjá sveitarfélaginu.
  - e. Ef ekki er hægt að uppfylla þessi skilyrði getur dagforeldri sótt um bráðabirgðaleyfi til eins árs fyrir allt að fjögur börn.
  - f. Hafi dagforeldri tekið sér frí frá störfum í ár eða meira þarf að sækja um endurnýjun á starfsleyfi og skila inn öllum gögnum líkt og þegar sótt er um starfsleyfi í fyrsta sinn. Úttekt frá heilbrigðiseftirliti, brunaeftirliti o.s.frv. þarf að fara fram þrátt fyrir að ekki hafi verið skipt um húsnæði.
5. Beiðnum um starfsleyfi ber að skila til daggæslufulltrúa sem yfir fer þær og leggur fyrir fræðsluráð til staðfestingar innan við mánaðar frá því að beiðni berst bæjaryfirvöldum.
6. Eftirlit er með starfsemi dagforeldra af hálfu bæjaryfirvalda í samræmi við reglugerð nr. 907/2005 og heimilt að afturkalla leyfi bresti forsendur til áframhaldandi starfsemi. Sérstakur óháður eftirlitsaðili fer í þrjár óboðaðar heimsóknir til dagforeldra árlega. Daggæslufulltrúi sveitarfélagsins veitir dagforeldrum ráðgjöf, fer í boðaðar heimsóknir til dagforeldra á hverri önn og fylgir málum eftir.

Reglur þessar voru samþykktar í fræðsluráði þann 11. júní 2012, með breytingum sem samþykktar voru í fræðsluráði 3. nóvember 2014 og nú með breytingum sem samþykktar voru í fræðsluráði 25. febrúar 2021 og í bæjarstjórn 3. mars 2021.